

إعلانات التبرع لمستشفى السرطان تقتل المرضى الحقيقيين



السبت 12 يوليو 2014 12:07 م

كتب أحد المواطنين على حسابه الشخصي على موقع التواصل الاجتماعي "فيس بوك"، قصة معاناة والدته التي كانت مريضة بالسرطان، مع الإعلانات التي كانت تذاع على الفضائيات في رمضان العام الماضي، الخاصة بالتبرع لمرضى السرطان

ونشر لكم نص الرسالة:

"امي رمضان اللي فات وقت الفطار .. واحنا بنتفرج علي التلفزيون عادي .. كان في اعلان بيجي دايمًا عن عم محمد اللي "بيمئل" انو عنده سرطان .. وانه بيحوش فلوس لعيله قبل ما يموت عشان مش قادر يتعالج .. امي وقت الاعلان دا كانت بتسيب الاكل من علي السفرة ونفسها بتتسد و تحسب في اللي عمل الاعلان و تدعي عليهم ساعة الفطار .. امي كان عندها سرطان و كانت نتائج التحاليل كويسة و الورم كان بينحصر في الوقت دا مع ذلك الاعلان دا كأن مأثر فيها السنة دي العبقري اللي عمل الاعلان دا طلع باعلان ثاني يقولك السرطان = الموت .. اتبرع لو كنا في بلد تحترم الانسانية اللي عمل الاعلان دا كان علي الاقل اتسجن هو واللي وافق عليه وكان اتوقف الاعلان دا فورا طريقة الاعلان دا غبية و غير ادمية واضرارها اكثر بكثير من منافعها .. الاعلان دا لازم يتوقف

في ناس كثير عندهم سرطان بيشفو الاعلان دا وبيتعالجو من اموالهم الخاصة و مش عاوزين من الدولة حاجة .. المعنويات شئ مهم جدا لمحاربة المرض .. تخيل الاعلان اللي المفروض يساعد الناس علي محاربة المرض ، بيحارب معناويتهم اللي فعليا هي اللي بتحارب المرض

الاعلان دا بيدمر معنويات مرضي كثير .. طريقة الاعلان دي بتخلي المرضي دول عايشين في كآبه .. مرضي بالسرطان ماتو ومرضي ثانيين هيموتو قبل الاعلان الجديد لمعهد الاورام في رمضان 2015 اللي برضو هيبقي بنفس الاسلوب القذر

طالما انتو كذا كذا مش قادرين تساعدو الناس فسيبو الناس يعيشو اليومين اللي عايشينهم

انا امي ماتت من شهرين بسبب السرطان .. امي كانت بتتنكد وهي بتفطر كل يوم في رمضان بسبب الاعلان دا .. السرطان ممكن يجي لاي حد فارحمو الناس اثابكم الله

الرسول صلي الله عليه وسلم يقول " الكلمة الطيبة صدقة "

ممكن جدا تساعد الناس بطريقة تدل عالسعادة و الامل في الحياة زي اعلانات مستشفى 57357 فكرتها بسيطة و مش بتقول للاطفال انهم هيموتو يعني هيموتو بالعكس يعرضو حالات خفت و هزمت المرض."

الجدير بالذكر أن معظم من يشارك في هذه الدعايا من الممثلين الأصحاء وليسوا من المرضى